

O CÉNTIMO SANITARIO: ¿COMO PODEMOS SOLICITAR A SÚA DEVOLUCIÓN?

Somos milleiros os afectados pola actuación contraria a dereito das Autoridades Públicas, as cales desoíron en numerosas ocasións as advertencias da Unión Europea relativas a improcedencia do céntimo sanitario. O Estado español, por riba de ter vulnerado os dereitos dos seus cidadáns, decide utilizar a política do medo e atemorizarnos con posibles sancións económicas por reclamacións indebidas, en vez de resarcir o dano que causou coa súa actuación. O seu comportamento non pode ser admisible nunha sociedade onde todos somos coñecedores dos dereitos é obrigas que nos corresponden como cidadáns. De aí o motivo de este pequeno post para dar a coñecer os dereitos dos que dispoñemos e das vías para a súa reclamación.

O Imposto sobre a Venda Minorista de Determinados Hidrocarburo, coñecido como o céntimo sanitario, é un imposto de natureza indirecta que grava as vendas minorista de gasolina, gasóleo, fueloil e queroseno non utilizado como combustible de calefacción. Dito imposto foi creado polo Goberno Central en Xaneiro de 2002 para contribuír a facer fronte aos gastos derivados do mantemento da sanidade pública, cedéndose ás Comunidades Autónomas con posterioridade, Galicia asume a cesión en xaneiro de 2004. É a partir de xaneiro de 2004 cando o imposto se articula en dous tramos, un Estatal e obrigatorio para todas as Comunidades, e outro Autonómico, que dependerá das mesmas.

O 27 de febreiro de 2014 o Tribunal de Xustiza da Unión Europea ilegaliza o chamado céntimo sanitario ao darlle a razón a empresa catalana Jordi Besora S.L., a cal solicitaba a devolución de 45.000 € ingresados indebidamente en concepto deste imposto. O Alto Tribunal considera que o

imposto vulneraba a normativa europea ao non perseguir unha finalidade específica, xa que as Comunidades Autónomas destinaban os ingresos recadados en concepto deste imposto aos gastos de sanidade en xeral, e non aos vinculados especificamente ao consumo dos hidrocarburos gravados.

A partir deste momento ábrese a porta a milleiros de transportistas, agricultores, mariñeiros, e a todos os cidadáns en xeral, para poder solicitar a devolución do diñeiro que se pagou indebidamente en concepto deste imposto. A súa reclamación pode efectuarse por vía tributaria ou administrativa. Para reclamar aquelas cantidades indebidamente cobradas entre o 1 de xaneiro de 2010 e ata o 31 de decembro de 2012 debemos presentar unha solicitude ante a Axencia Tributaria. Sen embargo, para solicitar a devolución das cantidades comprendidas entre o 1 de xaneiro de 2002 e ata o 31 de decembro de 2009 debemos presentar unha reclamación en vía administrativa.

En canto a reclamación por vía tributaria, a cal so nos permite reclamar as cantidades dende xaneiro do 2010, convén salientar que a Axencia Tributaria ven de publicar na súa páxina web un modelo normalizado para solicitar a rectificación da autoliquidación efectuada no seu día polo obrigado tributario. Dita reclamación pode efectuarse de xeito telemático ou mediante a presentación dun escrito que cumpra os requisitos legais en canto a forma e contido. Así mesmo, tamén é necesario aportar as facturas acreditativas das cotas gravadas. De non dispoñer das mesmas e ser un particular, tamén será posible aportar os tiquets dos que se dispoñen e unha copia dos mesmos, a cal se debe solicitar na gasoleira, e sempre que o importe non exceda de 3.000 euros. De ser o caso, e se se empregaron tarxetas de reportaxe en cada compra e nas mesmas se especifica o importe repercutido polo imposto, tamén se poderán empregar estas como proba. Están lexitimados para solicitar a devolución, tanto o obrigado tributario (consumidor final), como o suxeito pasivo do imposto (titular da gasoleira), este último é o obrigado a facer o

ingreso do imposto na Axencia Tributaria. Sen embargo, so o primeiro deles pode recibir a devolución do mesmo. No suposto de efectuar a solicitude de xeito telemático deberanse presentar tantas solicitudes como suxeitos pasivos repercutiron o imposto. A modo de exemplo, se repostamos o noso vehículo nunha gasoleira galega e noutra de asturiana, debemos presentar dous escritos, dirixindo o primeiro a Delegación Territorial da Axencia Tributaria de Galicia correspondente e outra a Delegación da Axencia Territorial de Asturias que lle corresponda. En canto ao prazo para realizar a solicitude, non existe un prazo concreto. Hai que ter en conta que canto máis tarde se presente, os catro anos de prescrición previstos neste procedemento contaránse dende ese momento, polo que interesa facelo canto antes. Ademais debemos ter en conta que se trata da revisión dunha autoliquidación que se fai de xeito trimestral, o cal supón que o para poder solicitar o abonado dende o un de xaneiro de 2010, habería que presentar a solicitude antes de 20 de abril.

Para obter a devolución do ingresado dende o 1 de xaneiro do 2002 e ata o 31 de decembro de 2009, como xa se indicou anteriormente, haberá que facer unha reclamación a través dun procedemento administrativo, fundamentado o mesmo na responsabilidade patrimonial do Estado Lexislador, ao causarse un quebranto como consecuencia da vulneración do Dereito da Unión Europea por parte das autoridades dun Estado membro. O prazo para poder presentar a reclamación é de un ano a contar dende o pronunciamento da Sentencia. Polo tanto, poderase presentar a reclamación ata o 27 de febreiro de 2015. A solicitude hai que presentala ante o Ministerio de Presidencia a través de calquera dos medios previstos no artigo 38.4 da Lei 30/1992.

Esperamos que esta información vos fose de utilidade e que gracias a este post coñezades un pouco máis as posibles vías para reclamar o céntimo sanitario. Se tendes algunha dúbida ao respecto ou vos interesa coñecer un

pouco máis a dinámica para levar a cabo a solicitude da devolución non dubidedes en poñervos en contacto connosco.